



UPA 2014/130.1
27.03.2014
KL

Uunga siunnersuut: Sumiiffinni nunami aalajangersimasuni takornariartit-sinermut akuersissuteqartarnissaq pillugu Inatsisartut inatsisaat nr. 19, 3. december 2012-imeersup allangortinnissaa pillugu Inatsisartut inatsisaat nr. xx, xx.xxx-imeersoq.
(Inuussutissarsiornermut Aatsitassanullu Naalakkersuisoq)

Inuit Ataqatigiinniit allaffissornikkut sullissinerit pisariillisarniarneqarnerat sullitallu eqaannerusumik sullinneqarsinnaannerannik kinguneqartussamik iliuuseqarniarneq isumaqatigaarput.

Matumani akiliisitsilluni sumiiffinni aalajangersimasuni, takornarianut avataaneersunut aalisartitsisinnaannermut akuersissutit oqartussaaffigineqarnerat Aalisarnermut, Piniarnermut Nunalerinermullu Naalakkersuisoqarfimmiikkaluartup toqqaannarnerusumik takornariaqarnermik suliaqarfiusumut Inuussutissarsiornermut Aatsitassaqarnermullu Naalakkersuisoqarfimmiit akisussaaffigineqalernissaa pineqarpoq.

Pissusissamisoortutut isigaarput takornarialerisut allalluunniit takornarianut sullisserusullutik piukkoortut, ataatsimit aallaavilimmit sullinneqarnerisa ingerlanneqartarnissaat. Matumani aalisakkat aalisarfissallu pineqarmata pissusissamisoorpoq aalisarnermut attuumassuteqartut qanimut suleqatigalugit paaseqatigalugillu aalajangersaanerit ingerlanneqartarnissaat.

Soorluttaaq sumiiffinni assigiinngitsuni "inatsisit allassimangitsutut" taaneqarsinnaasut, ilaqutariit ileqqoralugu sumiiffinnik atuvissuunerisa kingornuttakkatut isigineqartut, eqqarsaatigalugit aamma nalilersuinerit ingerlanneqartarnissaat pisassasoq kissaatigigatsigu. Sumiiffiit toqparneqassatillugit tusarniaasarnerit piurnissaat pisariaqarpoq.

Nunarsuatta sinneranut nunatta ilisarnaatigisariaqagaa tassaavoq nunap pigisaanik nakkutilliilluartuussugut. Sumiiffinni aalajangersimasuni akiliilluni aalisarsinnaanerup periarfissaanera aamma nakkutiginnikkusunnitsinnut ilaavoq suli ineriartortinneqartariaqartoq.

Nunatta pisuussutaat suulluunniit uummassusillit uummaatsullu, nunatta avataanniit tikeraartutsinnit qanoq atorneqarsinnaannerisa tamakkiisumik maleruagassiuunneqarnissaat tikikkiartuaarneqartariaqarpoq.

Nunatta ilaanni nalinginnarineqalernikuvoq aaqqissuussamik takornariaqatigeerujussuit eqaloqarfinnut pitsaannernut ornigannaqaalersarnerat killeqanngitsumillu pisuussutinik atuillutik nunatsinniinnertik atortaraat.

Neriulluta aaqqissuussanik takornarianut neqerooruteqarsinnaaleriartuaarnitsigut tikeraartutsinnut piunasaqarsinnaannerput aamma alliartussasoq, pisuussutillu pigisavut "tigoqqaaraata pissavaatut" pinnagit nakkutigilluarlugit tikeraartutsinnut neqeroorutiginerulissagivut.

Taama oqaaseqarluta aappassaaneerneqartinnagu ataatsimiitsitaliamit susasaqartumit qimerloorneqaqqaarnissaa kissaatigaarput.